

# FILEMÓN

## Apóstol Pablopaj Escribiskan Carta

---

### Saludo

<sup>1</sup>Noka, Pablo, preso caní Cristo Jesusraycu. Hermano Timoteopiwan cay cartata escribimuyqui kanman, Filemón, munaska llanc'ajmasyicu, <sup>2</sup>wasiyquipi culto ruwaj hermanocunaman, hermananchis Apiaman, Señorpaj obranpi ñac'arejmasinchis Arquipomanpas. <sup>3</sup>Dios Tatanchis Señor Jesucristopiwan kancunata bendicichun favorninwan sonko tiyaycuyninwan.

### Filemonpaj munacuynin creeyninpiwan

<sup>4</sup>Oracionniycunapi kanmanta yuyaricuspa, Diosman graciasta konipuni, <sup>5</sup>imaraycuchus willawancu Diospi tucuy creyentecunata munacuskayquimanta, Señor Jesuipi creeyniyquimantawan. <sup>6</sup>Kan creejmasyipaj Diosmanta mañacuni, Cristo Jesuipi tucuy bendicioncuna capuwaskanchismanta allinta entendinayquipaj. <sup>7</sup>Munacuyniyquiraycu animaska sinchi cusiska cachcani; kanraycu, hermano, creyentecunapas cusichiska cancu.

### Pablo Onesimopaj favorta mañan

<sup>8</sup>Cristopaj apostolnin caskayraycu, derechoyoq caní ima ruwanayquita mandanaypaj. <sup>9</sup>Chaywanpas rogayta munayqui munacuyniyoj caskayquiraycu. Noka, Pablo, ña machuña caní, Cristo Jesusraycu cunanka preso caní. <sup>10</sup>Uj favorta mañacuyqui Onesimopaj; payka cay carcelpi Diosman cutiricuspa waway jina cachcan.

<sup>11</sup>Ñaupajka Onésimo mana sirvej carkan kanpajka, cunantaj sirvej capun kanpaj nokapajpas. <sup>12</sup>Ujtawan cachampuyqui; payta jap'ekay noka quiquiyta jina. <sup>13</sup>Nokaka munayman nokawan caypi cananta, cuentayquimanta sirvinawanpaj, evangelioraycu preso cachcajtij. <sup>14</sup>Mana permisoyquiwan mana imatapas ruwayta munanichu,

favor ruwawaskayqui mana mat'iska cananpaj, manachayri kanpaj munayniyquimanta. <sup>15</sup>Ichapas Onesimoka kanmanta ithiricorkan uj tiempota, cunan astaquipaj kanwan capunanpaj, <sup>16</sup>manaña esclavo jinachu, astawan allinpajraj esclavomanta nejtenka, uj munaska hermano jina. Nokaka payta sinchita munacuni; kanka astawanraj munacunayqui, mana mayken runata jinallachu, manachayri Señorpi hermanota jina.

<sup>17</sup>Ajina ari, sichus creyentemasiquita jina jap'ekawanqui chayka, payta jap'ekay noka quiquiyta jina. <sup>18</sup>Sichus mana allincunata ruwarkasunqui chayka, chayri manuyqui cajtinpas, nokata cobraway. <sup>19</sup>Noka, Pablo, quiquin maquiyan cayta escribimuni. Noka pagapuskayqui, ¡yuyachiyta atiyman noka willajtiy creeskayquimanta manuy jina caskayquita chaywanpas! <sup>20</sup>Arí, hermanóy, cay favorta ruwaway Señorpi creyente jina. Cusichiway Cristopi hermano jina.

<sup>21</sup>Escribimuyqui, seguro caspa casucunayquimanta. Yachani ruwanayquita astawanraj mañaskaymanta nejtinpas. <sup>22</sup>Wasiyquipi alojacunaypaj waquichipuway. Oracionniyquichista Dios uyariskanraycu, jamuyta suyachani kancunawan tupanaypaj Diospaj favorninman jina.

### Saludocuna

<sup>23</sup>Cristoraycu presomasíy Epafra saludamusunqui. <sup>24</sup>Llanc'ajmasiycuna, Marcos, Aristarco, Demas, Lucasiwan saludamusunquichis. <sup>25</sup>Señor Jesucristo favorninwan kancunata bendicichun. Ajina cachun.